

四庫全書

集部

欽定四庫全書

五百家播芳大全文粹卷七上

宋 魏齊賢

葉 棻同輯

謝賜賚表

文字 厯日 衣帶 鞍馬 賜第 藥物

賜宴 生日

謝狀元以下賜周官表

陳誠之

聖經雅興誕申儆於百官宸翰昭回用垂賁於多士得
茲未有悅若自驚中謝竊念臣等猥以迂愚粗勤學問

身與諸生之列名叨六藝之科考師友之淵源蓋慚於
甚淺論政事之得失或愧於不知載省其中未堪自信
陛下矜其無狀將試臨民謂何必讀書恐弗充於為學
而不克師古亦因匪於攸聞若昔大猷布在方策雖在
羣儒之所習尚憂一旦之或忘爰札周官以彰聖訓上不
及於簿書期會之務下無間於米鹽細碎之煩戒於典

常勸之功業道本稽於文武炳若丹書筆夙掩於鍾王
倬茲雲漢竊瞻偉觀仰認淵衷樂此光華下逮愚陋茲
蓋伏遇皇帝陛下德參化育誠茂經綸念夫法令為師
恐流於刻薄要以詩書臨政可致於中和於其筮仕之
初導以見經之旨肆令么麼均與恩盼臣等謹以十襲
寶藏三復告誡不惟逸豫將終身而由之奉以周旋顧
從政乎何有其為感極至於涕零

謝賜御製孔門七十二子贊表 魏道弼

奎畫文章不顯杏壇之至教牙籤玉軸蔚為泮水之榮
觀偉此道之興崇振斯文之烜赫三熏拜賜十襲秘藏中

謝竊以元聖素王雖一時之窮厄立言垂訓實萬世之
宗師受其義者三千速而肖者七十類升堂而入室咸
附翼以攀鱗自昔流傳見史臣之稱贊於今特盛仰聖
作以褒揚如聞魯國之絃歌恍若孔門之問答煥龍光
之所被覺廟貌以增輝普頒惠於儒宮用開明於士類
茲蓋伏遇皇帝陛下多能天縱盛德日新當萬機之燕

閒探六經之奧旨發為睿藻迥超兩漢之文親灑宸毫
高出二王之法恢張吾道竦動多方臣猥以諸生欽承
寵錫潛心熟讀真同易義之重交盥手披觀下陋唐宗
之三絕

謝賜御書孟子表

范元卿

蘊奧之義默契於淵衷昭回之文發揮乎宸翰分頒有
寵拜賜惟寅中謝竊以戰國縱橫衆言淆亂乃篤生於
亞聖以丕振於醇風闢楊墨之功不在禹下非堯舜之

道不陳王前著為一經垂之萬世伏遇皇帝陛下投戈
講藝肆筆成書既深造於七篇復妙臻乎八法寫之琬
琰炳之丹青鳳翥鸞翔載出河圖之畫金聲玉振復傳
洛誦之文臣猥被鴻私親瞻睿藻樂與諸生之講習益
昭治世之昇平

謝賜御書孟子表

擬聖而作畫包羅天地之情肆筆而書發昭回雲漢之
象寵頒儒館增賁人文

中謝

竊以百家存而醇者孟軻

孰傳是學萬世知其解者大聖獨尊斯文惟默契於淵
衷爰發揮於宸翰紹唐虞雍熙之治闢楊墨放蕩之辭
炳若丹青寫之琬琰坐令亞聖之道復振右文之朝茲
蓋伏遇皇帝陛下盛德日新多能天縱翫味七篇之奧
縱橫八法之精洛書河圖闡千齡之秘蘊璇題寶閣聳
多士之偉觀臣敢不奉以周旋道之德意謹庠序而申孝
弟但明人倫薄稅斂而易田疇更期民富

謝賜御書孟子表

潛心德奧難量聖學之深微肆筆書成共仰奎章之炳
煥敦化孰大拜賜為榮中謝竊惟典學乃帝王之心
游藝亦聖人之事雖文沒而道未墜於地自軻死而道
不得其傳茲由心畫之精得究人文之盛恭惟皇帝陛
下道妙自得天縱多能方萬機之迺衡遍乙夜以監古
謂知言之要一本仁義而得書之體不外形聲乃於七
篇之中備見八法之妙取諸運掌契若合符眷茲在外
之臣亦被非常之賜臣幸窺宸翰庶獲盡心奉以周旋

倬彼雲漢之顯著格於上下昭然神物之護持

謝賜御書傳神贊表

秦檜

雲漢之章炳耀盪日奎壁之畫森列昭天自惟糞朽之
姿曷稱龍光之澤對揚大賜熟復深慙

中謝

伏念臣山

澤臞儒鉛槧末技麈頭鼠目甚寢可憎馬勃牛溲雖收
何用畫茂聞於籌筆圖敢望於凌烟屬上聖重整於乾
坤俾遠臣密依於日月考甘露麟閣之選叅永平雲臺
之篇繪此支離藏之中秘冠標題於博陸親洒仰紐書

之成先興贊於蔚宗視草靡一辭之措高蹈前古流芳
匪今此蓋伏遇皇帝陛下天縱多能日新盛德依於仁
而游於藝思其始而成其終誰謂愚昧首叨顯設臣敢
不仰布四體精白一心才不長而貌不揚所資術正教
之先而述之謹更懋義方

謝賜御篆碑額表

王豐父

臣某言伏蒙聖慈特降御筆發明先臣某舊勞特賜御
篆神道碑額及勅差官撰書碑文添修碑樓并立石者

閔四朝之故老前績久湮仰八字之神毫沉寃一洗恩
歸獨斷事協公言墓隧生光門閭復振中謝竊以宣尼
表延陵之墓止獲素王之褒明皇題懷慎之碑顧匪聖
君之作猶事美於當代而名傳於無窮恭惟皇帝陛下
仁冒天淵明齊日月煥堯章而致治纂禹績以圖功迪
高后以康兆民永懷先烈定大策以安宗廟爰軫舊勞
重念先臣早逢嘉會遇聖神於五百歲位宰執者十六
年有協贊事功之勤及維持法度之效念嘉祐受遣之

事餘藁俱存察元豐建嗣之初忠言莫掩特下發中之
詔用明既往之勲俾立豐碑庸旌舊壘松楸改色原隰
增輝帝席彌文已極春秋之法跳龍寶篆更高科斗之
書裁銘屬乎相臣書丹詔乎法從俾完傑閣復命樞庭
殊方傳以歡忻善類為之鼓舞精忠舊德事既白於九
泉弱孤微軀報共期於一死

謝賜御筆表

晁之道

二聖奎圖恭承睿覽先臣勲德深軫皇慈親御宸毫俯

臨部室三光叅照千載增榮

中謝

伏念臣先父臣某勤

勞百為夷險一節昔事仁祖再登宰衡外則成河朔百
年之功內則啟嘉祐援立之策原陵嗣服深褒王佐之
才神考尊賢特右相臣之席晚被元豐之詔大明至和
之功位冠宗臣勛在王室凡聖謨之詢逮與睿眷之寵
嘉翰墨具存賡歌未遠獲徹聖神之聽益昭皇帝之明
曲念遺忠俯矜哀緒忽驚雲漢下燭草茅惟一旦之所
蒙豈平生之敢冀而臣艱難薄命蹇淺下材自蹈窮途

仰慙先烈數勲勞於多士無不遭逢獨寒瘁之一門最
為哀替果蒙憫惻特借輝光此蓋伏遇皇帝陛下惠澤
川流皇慈天覆治功駿偉稽二聖而比隆誠意簡孚格
三靈而並貺休符衆至協氣橫流惟八方覆載之間舉
無不獲豈四朝勲勞之後乃忍獨遺收之罪戾之餘被
以涵濡之賜恩加沒世榮動里閭念臣積愧冥頑粗傳
忠孝獨叩天路以明父勲不辭斧鉞之嚴誅必冀精誠
之上達前蒙昭鑒盡滌往愆今叨寵靈更逾始望自惟

困蹶實廢生成冀曲加於保全俾少振於門戶臣敢不
內思淬礪外當激昂砥節立名不負教忠之訓闔門殞
首少酌報上之心

謝賜戒石銘表

張全忠

陞祀勒銘夙仰祖宗之猷訓輜軒傳軺載新郡邑之觀
瞻跽受以還兢榮罔喻

中謝

恭惟太宗皇帝削除僭偽

統一寰區屬四方新脫於干戈期百執恪遵於軌度肆
頒聖製用謹官箴炳若丹青揭頌庭而咸覩寫之琬琰

垂永世之不渝吏有勸懲人亦康乂閱歲華之滋久致
膏藻之弗宣有懷在位之苟媮深軫斯民之困敝得故
臣之遺墨見上世之宏規爰廣勤宣親加贊述大書深
刻粲然盤鼎之文俯翫仰思竦若韋弦之佩此蓋伏遇
皇帝陛下寬仁厚下勤儉保邦率由舊章紹復大業何
必官刑之儆自然民瘼之除紫詔相輝陋漢王之一札
黃堂增煥配章聖之七條臣久遠清光猥叨重寄惕然
拜賜曾無咫尺之違顏何以酬恩尚勉期年之報政

謝賜戒石銘表

葛譙白

天語丁寧誕敷寰宇雲章黼黻俯逮私門祇奉匪頒惟
知欽佩

中謝

竊以太宗皇帝憂國若渴視民如傷虞郡

縣之吏游食以瘞官慮姦貪之臣瘠人而封已親紆實
思申勅庶邦立為戒石之銘光動奎躔之次庶乎委贖
之吏咸有奉公之心而乃審訓弗昭攸司尚闕雖知惇
史所載固磊落而弗陳然非邇臣再書殆洩汨而難見
恭惟皇帝陛下勵精庶政聿圖康功以孝奉先故宣布

前朝之美以仁利物故發揮永世之規以謂德宗嘗製
臺衡之銘明皇大頒令長之戒猶傳琬琰顯示臣鄰惟
昭代之彛章實作萬方之藥石倘稽遐布曷示深慈爰
錫輔政之臣俾奉如絲之旨臣謹丕承德意上體格言
孫子襲藏永作緹巾之寶晨昏警醒揭為座右之觀

謝賜元祐新編勅表

田承君

一成不變君子所以盡心百世可知聖人所以救弊道
存損益法有重輕講求既合於大中詳用必歸於至當

頒諸率土賚及愚臣祇荷寵光伏增醜汗伏惟太皇太后陛下躬任姒之德秉堯舜之心宣室齋居既親於庶事明光斷獄乃止於數人尚慮滋彰務通貫變俾之難犯而易避蓋出惡殺而好生克成幾措之風誕布不刊之典臣猥叅近侍誤簡清衷顧此新書亦蒙大賜坦然明白既無詳讞之疑奉以周旋期盡哀矜之志載惟聖訓永得家藏

謝賜歷日表

崔德符

舟車所至盡襲漢儀冠帶之倫咸遵周朔

中謝

恭惟皇

帝陛下明兼五緯道貫三才宰制羣倫春生而秋殺鼓舞萬類神動而天隨固已輔相物宜彌綸元化而復謹歲端而布政修陽厯以御時合璧連珠日月之行弗過方輿圓蓋天地之運靡差分至啟閉之候可知生成作息之功斯在惠我邦國錫之庶土而臣猥以謏材假守方郡恪推時令自洽於豐年寵佩恩宣永鐫於聖訓

謝賜厯日表

惟聖統天以時詔事肆頒紀厯深諭化工中謝恭惟皇
帝陛下治識惟幾道昭不宰祇事上帝謹陟降以無違
克綏兆民致弛張之有序仍俾承流之吏悉知從政之
方力赴事功彌有逢辰之幸顧慙駑蹇徒興既老之嗟

謝賜厯日表

晁之道

恭典神天載頒紀厯凡預承流之寄舉知從政之原中

謝恭惟皇帝陛下以道御時觀民設教配乾坤之覆載

極雨露之生成嘉與庶工共嚴七政春耕秋斂俾衣食

之無違陰慘陽舒致德刑之有序臣敢不敬率舊典奉
宣至仁期勿奪於民時願同歌於帝力望雲載躍仰聖
化之維新撫已自知懼功名之或晚

謝賜衣表

寒律肇開已屆始裘之候皇恩下逮猥頒在笥之珍拜
舞以還曳婁增愧中謝竊以遣賚綿楮漢文獨賜於藩
臣解錫襜褕光武第加於驍將未若霈寶慈於列位錯
文篚於周行均戴龍光共深爵躍恭惟皇帝陛下謙光

御下晉書接人布明明之德而衣被四方昭燦燦之儀
而粉飾百度致茲臣竊冒玷恩華臣敢不盡瘁王家協
恭公上庶乘軒之鶴少逃竊位之譏而在梁之鵲無復
冒恩之刺

謝賜冬衣表

出笥分珍在庭均賜方此御冬之始俱懷挾纊之溫中
謝
茲蓋伏遇皇帝陛下子視庶民天臨羣下遇之有禮
俾知臣節之恭豈曰無衣獨覺君恩之重臣等敢不力

圖其報仰稱所蒙惟公爾以忘私庶服之而無數

謝賜冬衣表

觀天四序斂一氣以成冬稽國九經與羣臣而同體趣
頒商筭下逮周行陛下丕冒羣工誕敷洪施當未明求
衣之際穆若有懷顧大寒索裘之時淒其將至乃申舊
典以示深仁臣等覆被君恩糜捐邦賦仰思報上傾星
辰拱北之心俯念裕民庠柚大東之詠臣無任

謝賜衣金帶表

王龜齡

綸言下逮懼器使之非宜恩數有加顧身章之弗稱退

量僥冒彌積兢慙

中謝

伏念臣性姿蠢愚世閱寒瘁獨

遇盛明之旦亦晞奮勵之規誤竊儒科曾是青氎舊物
推遷仕牒徒驚華髮垂顛依造化之大鈞乏毫釐之小
補越從瑣闥擢寘憲臺圖退避之無由服榮寵之若此
雖將自竭曷報所蒙茲蓋伏遇皇帝陛下軫念臣工修
明典禮示等衰於百執致藩飾於羣倫既厚匪頒俾有
曳婁之煥曲形慰藉終逃負乘之譏仰戴生成敢忘糜

金史卷之七
卷之七上
捐

謝賜衣金帶表

仰承恩綸復持從橐賜身章之過渥顧物論以多慚中

謝伏念臣稟性蠢愚入官遲暮心常震悸早緣憂患之

侵臂輒拘攣頗覺筋骸之老願投閒散庶養病羸茂林

豐草之可思佩紫懷黃之弗稱退惟忝冒實出遭逢茲

蓋伏遇皇帝陛下道大兼容仁深善貸衣被萬方而加

名數之謹鼓舞羣動而推爵賞之優致茲衰孱亦預獲

飾臣敢不勤勞夙夜銜戴瞻思永言糜捐之期不辱曳
婁之美臣無任

謝賜玉帶表

王介甫

臣某言伏蒙聖恩以收復熙河洮岷疊宕等州特加褒
諭親解玉帶賜臣者尸位列侍方臨極辦之朝暫御瞻
傳獨拜非常之賜寵綏狎至懇避弗逾焜耀有加凌兢
無措中謝竊以河洮之業洮自聖謨方虎之材進非師
錫片言投匭遂察見其有孚衆訛盈庭預照知其無責

以至授兵算食蒐卒第功能畢協於始謀實仰歸於獨
斷如臣叢爾何力有焉伏惟皇帝陛下善貸且成勞謙
不伐弛曠瘵之大責錄將明之小忠揚于廣除委以珍
御瑟彼英瑤之質煥乎華袞之言臨授用光顧榮踰於
古昔退藏惟謹知燕及於雲來施更厚於解衣報敢忘
於結草

謝賜衣襖表

晁之道

恩言溫厚已驚春律之回賜服焜煌更覺天光之被撫

躬甚陋跼地知慚

中謝

臣聞在筭勸賢人思務得解衣

撫士衆必捐軀親逢晏紫之期共載光華之寵恭惟皇
帝陛下仁敷動植威服蠻夷垂衣而四海寧振領而百
事舉載御如裘之禮爰思無褐之詩並賜恩榮俾詣安
吉審觀戰士已無鞭瘡之虞深省孤蹤必獲靡捐之願
臣無任

謝賜春衣表

青春三月時已迫於載陽丹禁九重衣特頒於在筭雖

動曳婁之愧敢忘衣被之仁拜授省循凌兢固措

中謝

恭惟皇帝陛下緝熙庶政藩飾羣工親御弋綈事每聞於克己寵頒束帛禮特厚於優賢粲然箱篚之儀溥及簪紳之列臣祇膺縉賜銜荷湛恩顧影知榮共詫章身之煥不衷是懼深虞濡味之譏

謝賜對衣金帶并金魚袋銀鞍轡馬表

王履道

出檐裳於內府束以環金引逸足於天閑副之釘轡寵

光存至震惕彌深

中謝

伏念臣學昧美身材難致遠偶

親逢於盛旦遂踐歷於華塗在垆之馬思無邪既繫維
之是就如子之衣安且吉曾藩飾之已多敢緣因任之
求更冒匪頒之渥茲蓋伏遇皇帝陛下如天覆物以道
馭臣顧雖疵賤之軀亦被便蕃之數不稱其服終無濡
翼之功既閑且馳徒誦卷阿之義其如報効已誓捐糜

謝賜對衣金帶鞍馬表

張全真

討論潤色已懼空殫衣被服乘更蒙蕃錫冒寵章而增

悸超禁路以知榮

中謝

伏念臣久安龍具之貧居豈識

蟻封之試足羈孤寡援誰憐范叔之寒災禍冥心久悟
塞翁之失竊重金之顯服跨沃轡之名駒病骨支離睿
恩優渥此蓋伏遇皇帝陛下仁而徧物哲以知人駿骨
而市千金灼知誠意狐裘之非一腋務盡衆長乃捐在
笥之珍曲示解驂之惠臣敢不仰思藩飾俯効馳驅束
帶而使與言倘不愧縉紳之列據鞍而示可用庶幾逃
負乘之譏

謝賜對衣鞍馬表

王介甫

出大庭之顯服束以精鏐引內殿之名駒傳之錯采隆
恩所逮朽質奚勝

中謝

竊以臣弱力淺聞久憂積疹中

預從官之選外叅守將之權僅免譴訶更蒙收召論思
潤色曾莫効於微勞衣被服乘乃前叨於異數此蓋休
遇皇帝陛下醴於慶賞詳在招延因示眷懷使知奮勵
誓竭愚忠之報冀無虛受之嫌

謝賜紹興府行宮賜本府充治所表

張全真

六飛回馭想清蹕之餘音一札疏榮復黃唐之舊觀吏
民交慶屏翰增嚴中謝竊以總帥七州提封八縣聽事

所在相攸允宜鑑水環城奠禹巡之沃壤龍山負海畫
秦壤之奇峰會逢輦轂之駐留煥發湖山之深秀逮於
法駕實擬陪都屬行殿之久虛眷守臣之僑寓乃捐管
籥以重藩維家在樓臺真踐詩人之勝戟森兵衛稍知
州將之雄居靡敢安恩豈無自此蓋伏遇皇帝陛下勵

精以復境土布德以綏邇遐俯稽晉文桑下之言懷安
是懼遠跡漢高馬上之略暴露靡辭復矜羣下之宣勞
惟恐一夫之失所方書下下之考遽享潭潭之居廣廈
千間已免震凌之患土階三尺尚存簡素之風忝惟帷
幄之舊臣獲拜帡幪之新寵一日必葺敢忘前哲之規四
方于宣期壯輔藩之勢

謝給還賜第表

王豐父

先臣被謗已經三紀之年聖主明功惟恃一日之澤載

頌宸筆復昇故廬百口有歸九泉銜感中謝竊以既宣
勞於國則延賞於朝圖申伯之居昔褒於臣績復周公
之宇實出於君恩重念先臣早以藝文浸階膺仕擢自
仁皇之世相於永祐之朝經體贊元克彰於成列受遺
定策首建於忠言遽興身後之讒誣盡削生前之秩賜
非遭上聖孰正舊勞茲蓋伏遇皇帝陛下有生畢容如
天之覆無幽不燭若日之臨明已判於是非惠乃加於
存沒父老嘆息再興蕭第之開車馬輕從益覺于門之

大族庖復共寢廟載安里旅無煩閭師相慶扶老攜幼
再成團集之歡飽食逸居永戴帡幪之賜仰圖報稱更
誓糜捐

謝賜功德院表

晁之道

款祖考之潛宮永懷先烈眷股肱之舊德申敷湛恩存
沒知榮臣工胥勸

中謝

伏念臣先臣某援立英祖輔翼

神宗肇先嘉祐之功備載元豐之詔勲居第一寵極無
前惟先壘肇建之始因乃昭陵念功而特賜晚從例奪仰

愧夙恩果深軫於至慈亟復歸於舊物荒原動色拱木
生光此蓋伏遇皇帝陛下誠心動天孝德錫類念神靈
興起之所自憫輔弼贊襄之有勞茂典殊私度越常數
俾先朝受遺之元老終不沒其幽光顧九原未泯之忠
魂必有酌於渥澤臣無任

謝許受嘉王書送表

王豐父

臣某言今月二十日皇子嘉王以臣被旨換府第上梁
文書送到銀絹等賞具奏狀辭免奉御筆不許辭免令

收者屬文無取優以寵頌陳免弗俞賁之宸翰先生幽

薨感溢忠衷

中謝

竊以受詔輒成漢專枚舉之譽援筆

可待宋獨王融之稱倘非敏捷之才曷顯文明之盛如
臣者稟資甚陋賦分數奇辱神聖之誤知以詞章之末
技含毫落筆恨相如之思遲鳴玉鏗金乏君房之語妙
每叨眷獎實絕等夷屬朱郎之聿開陞脩梁而告就遽
傳密旨謬索鄙文拜貺殊常露誠祈免仰跳龍之寶字
忽落人間霑披鳳之殊恩載加私室此蓋伏遇皇帝陛下

下堯文照世禹度包荒迹至眇而莫遺勞雖微而必賞
人咸自竭功格太平重念臣憂患餘生恩華特起稽山
太守媿冒買臣之榮漢闔拾遺空有汲生之願終圖捐
糜上答知憐

謝賜湯藥表

王介甫

隆恩博施弗以遐遺弱力薄材豈能仰稱

中謝

臣久叨

重任上誤聖知特荷眷憐備昭誠悃付以便安之郡休
其疲曳之軀跋涉之路未窮問勞之恩先至璽書甚厚

藥物兼珍此蓋伏遇皇帝陛下丕冒海隅寵綏臣庶簪履之舊不忍於棄忘雲天之高每存於庇幬永惟報効徒誓糜捐

謝賜夏藥表

錢叅政

典籥陪都夏時載閱分珍御府上渥重頒恭啓驛函敬祇奩劑伏念臣思慮久耗精神易衰蒹葭望息於雲間良藥忽從於天上清風濯熱冰圓誇玉井之冰大火流金雪散勝紅爐之雪滌除煩鬱扶起支離此蓋伏遇皇

帝陛下情寓南薰心常東顧欲除民愠俾逃內熱之傷
先責臣躬使布中和之惠臣既無憚暑惟有兢淩思已
安私盡出匪頌之德去民疾苦舉為仁壽之歸庶滿愚
衷仰酬大賜

謝賜喜雪宴表

呂伯恭

同雲雨雪南山已詠於豐年湛露晞陽北闕載開於華
宴先生觴豆澤浹簪裾恭惟皇帝陛下昭受天休鑒觀
民阜醴泉甘露靡容太史之書旨酒嘉肴獨侈農夫之

慶凡陪鎬飲咸識堯心臣等濫列垂紳喜均側弁一日二之日既沐洪恩千斯倉萬斯箱行觀嗣歲

謝喜雪賜宴表

爲謙白

燭龍照山優渥已彰於天瑞游魚在藻燕胥曲荷於君仁命出九閭慶均百辟恭惟皇帝陛下躬持慈寶默運道樞時調玉燭之和氣協瑤花之應三靈字佑九扈兆豐肆頒湛露之恩大作需雲之席宴觴有衍朝弁無譁移方丈之仙山奏鈞天之廣樂賞同梁苑凝曜悉駭於

奇觀享類鈞臺鼓腹盡霑於飫賜臣濫叨變理實預榮
懷秩秩初筵已敷崇於體貌縷縷丹悃誓歸報於忠嘉
謝賜生日禮物表

驛使星臨芝封天降曲記始生之日旅頒多物之儀祇
荷慈憐徒深感惕中謝伏念臣親逢亨會寢躡榮塗職

庀金華術業何裨於廣廈班通黃閣謀謨莫効於嚴宸
方懷冒昧之慙忽享便蕃之賜牧分生餽樽漾香醪珠
春襪綬之良玉屑枕櫛之美駢茲庶品併賚罔功此蓋

伏遇皇帝陛下禮備養賢仁深接下特存彛制寵示恩私猷賜所加已拜匪頒之渥素飡是懼敢忘盡瘁之忠

謝賜生日表

王介甫

臣某言伏蒙聖慈特差臣女壻前守常州江陰縣主簿蔡卞沿路押賜生日禮物一對衣著一百匹金花銀器一百兩馬二匹金鍍銀鞍轡一副者寬假之恩幸從於私欲匪頒之寵尚玷於常科知報稱之良難積驚慙而實厚伏念臣見收束路承乏近司犬馬之力已殫訖無

補報螻蟻之誠自列竊幸退藏尚兼將相之崇且受藩
維之託叨踰已極賜與更蕃此蓋伏遇皇帝陛下仁冒
海隅禮優臣庶宥衆尤之積累示全度之并包爰及微
生具膺殊獎致養以樂永懷弗洎之悲移孝則忠敢怠
進思之義

謝賜生日表

慰藉溫言匪頒異數荷恩勤之及此思報稱以蔑然中
謝伏念臣繆簡帝心叨陪大政以久孤之朴學當難遇

之盛時雖罄愚忠何裨聖治門弧可想方永念於劬勞
臺餽有加更上煩於寵獎此蓋伏遇皇帝陛下施仁品
物致禮臣鄰將備責於安危故俯同於憂樂所願輸忠
而後食敢知得賜之為榮矧生已之至恩已云不報獨
事君之大義庶或無慙

謝賜生日表

璽書加獎臺餽示優屈使者之光華發里門之榮耀中
謝伏念臣才非秀穎勢又羈單方少也臣父教臣以為

欽定四庫全書

集部

五百家獮芳大全文粹卷七下

詳校官編修

臣謝振定

助教

臣常循覆勘

總校官編修

臣王燕緒

校對官中書

臣葉蘭

謄錄監生

臣任銜葵

欽定四庫全書

五百家播芳大全文粹卷七中

宋 魏齊賢

葉 棻同輯

陳乞表

乞外任表

劉莘老

不備而惟其人故輔臣必有賢者無功而在其位則詩
人所以刺之輒控籲天之誠冀逃累國之責

中謝伏念

臣越從羈遠擢寘顯嚴才不足以達政經學不足以斷
國論無嘉猷以副虛佇之託無重望以慰具瞻之心顧
慕留連逡巡俯仰雖皇慈之善貸豈清議之所容夫物
理之常器滿則易覆古人之戒位高者疾顛加之多懼
而積憂是以早衰而易病外雖強而中涸日常耗而髮
童日迫傾危上孤任使再殫螻蟻之志敢避鈇鉞之威
伏望皇帝陛下大明燭幽至道成物察臣今日進退之
計本無他腸貸臣累年尸素之愆俾全晚節庶稍循於

禮義免玷於生成蕃宣倘界於一州報効敢辭於九
隕叩閭俯伏得請是期

乞外任表

前人

臣聞事君必盡其誠故當無隱陳力有時而止蓋以不
能輒傾底裏之懷仰瀆高明之鑒

中謝

伏念臣所學昧

陋稟生拙艱敢希當時之功名徒慕古人之節行逮四
朝而竊仕遭二聖之誤知濫廁羣材遂與初政遷進歷
塵於三省首尾已及於四年不繫去來無能軒輊唯

智慮淺而已竭加以憂患多而早衰兩目頻昏百骸多疾遲回戀寵出入覲顏內招竊祿之災外坐妨賢之罪與其待人言而後去上煩典刑不若揣己分以自陳猶全出處輒傾孤懇願丐一州伏望陛下廓日月之明大乾坤之度矜此已疲之犬馬貸其無補於涓塵特推從欲之仁不惜分符之寵使有民社宣惠澤而下流庶於桑榆收微勞以自効欲乞解罷職事除一外任

乞外任表

前人

近上封章願辭職任恭承批答尚秘俞音輒再冒於譴

誅非敢輕於出處

中謝

臣誤膺獎拔本之器能一預政

機四更歲籥有妨賢之積愧無事道之顯名每驚弱植
之漂搖常賴至仁之掩覆滿溢必殆盈虛有時非不知
聖神之運難逢天地之恩未報然才智止於如此踈繆
見於已然用之易窮如鼠之五技去不為少若鳧之雙
飛况爵祿者天下之至公難貪而久處進退者人臣之
大節竊冀於少完倘可效於涓埃顧何分於內外伏望

惻其懇款賜以始終大譴大訶稍黜幽之憲有民有社願膺共治之容誓將勤養於小民尚得仰酌於洪造
乞外任表

黃魯直

蒙恩待罪著作討論史事預聞聖朝大典實以為榮而臣才不逮人讀書有數見聞淺陋無助闕遺黽勉素餐已糜歲月重以老母年垂七十寢飯須人朝請坐曹義當夙夜退則有虧子職進則無補公家敢申犬馬之情仰望乾坤之造伏望聖慈除臣一江淮合入遣差問民

疾苦得以効於吏功將毋肯甘或少裨於孝治

乞外任表

歐陽永叔

事君以忠本期盡瘁不能者止亦貴自知敢傾悃悞之

誠仰瀆高明之聽

中謝

伏念臣本由寒素偶踐科場祇

希干祿以養親敢冀逢時而見用蓋以腐儒章句之學

豈堪王佐之才童子雕篆之文固異賢人之事而誤蒙

睿獎俾貳宰司訖無毫髮之可稱常懼滿盈之必覆加

以年齡迫以衰晚氣血損於憂傷惟兩目之舊昏自去

秋而漸劇精明晻靄瞻視茫洋冬春以來職業多廢當
聖君求治之始是羣臣宣力之時是嗟犬馬之微軀遽
先疲乏惟恃乾坤之大度曲賜含容雖未責於曠官亦
難安於尸祿與其坐待於彈劾豈如自乞於哀憐伏望
皇帝陛下推天地之恩回日月之照察其愚直不敢矯
誣解政事之名假以州符之寄則臣不止偷安而養拙
亦將自療以求痊尚冀昏瞳之復明會圖後効而報稱

乞外任表

前人

忠以事上雖見義而必為力有不能則知難而當止是
惟臣子進退之分實繫國家利害之機則其居也敢懷
竊位之安其去也豈止全身之計輒殫拙訥上瀆高明

中謝

伏念臣本以庸妄出於孤單學不通方識非慮遠
徒以遭逢先帝誤被聖知擢自諸生俾叅大政伏遇皇
帝陛下膺期出震繼統當天方聖政之惟新思羣材而
並濟臣以衰遲之朽質久當機要以妨賢有守經泥古
之愚無應變適時之用考於外論早合黜幽伏蒙陛下

廓大度以兼容謂衆惡之必察特加庇覆俾獲保全固當勉勵疲駑誓圖報効而臣量盈器極福過災生兩目眊昏積年舊苦中消渴涸新歲所加精液消澌志與神而俱耗革膚削氣將力以俱殫臣若猶強殘骸竊貪厚祿坐取敗官之責上累知人之明苟以此致興於人言則乃是可畏之公議異夫誣謗難復主張此臣所以深自揣思敢陳悃迫伏望陛下曲垂睿眷俯察愚衷念其獲親日月之光頗歷歲時之久居常碌碌曾莫異於

片言一有紛紛遂獨當於衆怒尚乏周身之智豈堪爲國之謀因其自訴於病衰幸俾獲逃於罪戾退之散地得盡餘齡則臣永荷天地之恩敢忘犬馬之報

乞外任表

歐陽永叔

生貪國寵既以難安仰叩帝閣期於必達

中謝

伏念臣

早緣幸會親覲休辰以一經之腐儒叅萬機之密論違時背俗速謗招尤雖無獨立弗懼之明粗懷可殺不辱之節所以強顏忍恥不知軒冕之榮加之多病久衰難

勝筋力之任近從去歲益以中乾渴如羆鼠之飲河喘
若吳牛之見月多言外噪衆疾內攻心已自危豈足當
於謀慮力雖欲強幾不至於踣顛方奮銳於壯時猶無
可道逮推傷於晚節亦復何堪雖幸聖君容覆之恩豈
逃神理滿盈之罰苟不知退其將殞生伏願皇帝陛下
推天地之私回日月之照察臣粗識廉恥閔臣遽此衰
疲丐以一州俾從素志如此則力排羣議已荷於保全
遂養殘生更繫於亭育雖同草木之賤尚識造化之仁

乞出表

王介甫

丞相之職天子是毗方當圖政之憂勤難以養疴而昧
冒輒輸情素仰丐恩憐中謝臣叨被鴻私誤尸揆職堯
仁天覆幸荒穢之蕪包湯聖日躋顧卑凡而自絕尚惟
許國姑示忘軀豈意眩昏甫新年而寢劇更知驚蹇難
重任之久堪伏惟皇帝陛下明燭隱微惠綏羈拙閔其
積疾收還上宰之印章賜以餘年歸展先臣之丘壠生
當擊壤以詠矜容之德死當結草以酬含育之恩

乞出表

前人

使陪國論惟亮天功必用強明乃能協濟豈容昏瞽可
以叨居進冒聰聞罄陳危悃

中謝

伏念臣逮侍先帝列

官外朝晚以求歸因為病廢伏遇皇帝陛下召還詞禁
擢預經筵收於衆惡之中諏以萬機之事構讒誣而並
至輒賜辨明推孤拙以直前每蒙開納陛下所以遇臣
者可謂厚矣臣之所以報國者終於缺然豈理勢之獨
難抑才能之素薄方懼過尤之積乃懼疹疾之加比欲

外乞州藩易以就營醫藥重念宋薪之弗給尚何守土
之敢謀輒緣不能者止之言庶免貪以敗官之悔伏望
陛下曲垂仁惻俯記愚忠賜以分司一官許以江寧居
止則天地之德實有施於餘年犬馬之勤冀或輸於異
日

乞出表

明主訓辭之寵宜即奉承匹夫志守之愚敢覲矜允
中
謝竊以品制百為總裁萬物任怨蓋難於持久服勞安

可以獨賢所以中外迭居是為祖宗故事況於疲曳加
以瞶昏若由昧冒而無慙其必顛隳而不救臣過叨膏
獎備進近司當循名責實之時故任怨獨多於前輩
魚蠲令改制之事故服勞尤在於一身雖蒙全度之恩
僅免譴訶之域其於多故實以難支矧疾疹之交攻且
事為之寢廢伏望皇帝陛下昭其惆悵假以優游使得
休養於衰疲以示保全於孤拙

乞出表

聖恩所及有隆天重地之施私義未安有深淵薄冰之

懼

中謝

竊惟成湯高宗之世有若伊尹傳說之臣其道

格於帝而無疑其政加乎民而丕變后惟時義相亦有
終迨乎中世之陵夷非復古人之髣髴忠或不足以取
信而事事至於自明義或不足以勝奸而人人與之為
敵以此乘權而久處孰能持祿以少安此臣之慮危於
居寵之時而昧死有均勞之乞況於抱病寢以瘵官茲
蓋伏遇皇帝陛下道與日躋德侔乾覆哀一夫之失所

樂萬物之皆昌矧夫眷遇之優既已勤劬之久宜蒙善貸使獲曲全賜其疲賤之身假以安閒之地則敝車無用猶可具於勞薪棄席未忘或再施於華幄

乞出表

私懷懇至已具布聞聖訓丁寧未蒙開納敢冒崇高之聽再輸悃悞之情中謝臣聞任賢之方要其有用陳力之義止於不能苟弗集於事功且重罹於疹疾豈容叨據以累聖明伏念臣猥以孤生親逢盛世昧於量已志

欲補於休明失在信書事寢成於迂濶每煩出論上恩
聖聰久知素願之難諧繼以積痼而自困辭而去位庶
逃竊食之誅勉以就工重荷包荒之德雖貪順命終懼
妨功伏望皇帝陛下闕度有容大明俯燭時垂矜允俾
遂退藏如此則孤進之身獲全生於末路具瞻之地得
改命於時材

乞出表

封奏上昭未能感徹訓辭下逮更誤褒加

中謝

臣聞恕

以及物者君之仁量而受事者臣之義蓋世之道有升而有降故士之行或肆而或拘遭聖治之包容冀私誠之獲遂伏念臣自蒙任使已歷歲時雖或售於小忠曾莫裨於大政迨茲癭瘝乃始告勞姑以免邦憲之詰誅何足汙上恩之獎勵使人狎至詔旨屢頒祇荷顧憐重懷感悸非不願粗施其朴學庶幾以仰副於鴻私顧惟剛德之寢亨方奮睿謀而獨斷辨忠賢之可任既示弗疑察奸罔之為朋將知所畏人宜盡力朝豈乏材寧容

昏憊之餘尚冒寵靈之厚伏望皇帝陛下離明俯燭解
澤旁施矜綿力之既愆監近司之或曠俯從控懇實允
詢謀雖已事之無稱難言報國冀餘生之未泯尚獲捐
軀

乞出表

邵公濟

使旨屢臨備宣德意詔詞繼下益佩恩私再冒嚴誅仰

干鴻造臣

中謝

伏念臣孤單寡與結納無奇濫處周行

久叨連帥荷收憐於遠服俾待罪於樞庭坐籌決勝之

罔功解難排紛之無策未委司敗獨賴聖知握髮數愆
空驚白首撫膺增愧唯嘆赤心顧茲福過以災生實因
力小而任重伏望皇帝陛下特垂淵聽俯諒微誠逸以
真祠置之散地俾愚衷之無負庶衰疾之有瘳來日尚
多敢憚捐軀之義餘生或泯猶思結草之忠

乞出表

歐陽永叔

事君之節雖盡瘁以為期量力而行有不能而則止敢
瀆蓋高之聽瀝陳至悃之誠中謝伏念臣本出羈單粗

知業履逢右文崇學之代竊並羣英之游當好問納諫
之朝獲從諸老之後遂蒙獎用叨貳機衡幸四海之無
虞得容尸素荷三聖之殊遇特察孤忠坐貪寵祿之榮
不覺歲時之久而餘齡向晚百疾交侵四體癯羸甚已
衰之蒲柳雙瞳眊瞶幾不辨於駟驪頃自去秋累陳愚
款先皇帝惻然垂憫慰以恩言許至新年俾解重任萬
乘之仙游忽遠孤臣之素願莫從方今聖統嗣興重明
繼照人神胥悅中外晏然顧無避事之嫌敢遂乞身之

請伏望皇帝陛下特回睿斷俯察懦衷念孤根之易危
哀小器之難用置之閒處賜以保全如此則天地之仁
曲從於物性犬馬之報尚識於主恩

乞避位待罪表

汪彥章

天事常象俄謫見於星文帝德罔愆蓋咎由於臣等亟
上需章之請願從齊斧之誅未賜矜從若為退聽

中謝

伏念臣等猥緣誤寵叨汙近司才不適時初無一日之
效罪乃累國至干三光之明既貽當宁之憂寧有在庭

之理敢圖睿聖意在寅恭任天下之責而欲以身先修
胸中之誠而不為文具外象無虛應捷如形影之相隨
倘變未能銷移寘股肱而奚益肆加訓勉深積兢危伏
望皇帝陛下垂察父之仁體昊穹之意選於俊傑付以
經綸無嫌大正於刑書勿使更妨於賢路既王省惟
歲朝廷皆有才則德聚占星社稷享無疆之福

乞避位待罪表

天文見異既驗實於保章政路非人宜自拘於司敗屢

布囊封之懇未行策免之誅尸祿為羞宜躬何所

中謝

伏念臣偶緣人之叨預政機雖有慙愚慕蕭生之憂國
畧無事業如伊尹之格天致星氣之飛流勞宸衷之儆
戒靖言塞變敢復逃刑爰席藁以自陳終叩闕而莫聽
雖一人退托引過失以自歸然四海沸騰謂調變之安
在伏望皇帝陛下稽各王之訓採輿論之公原大異之
來臻皆具臣之所致博求賢佐共修五事以承天母循
虛文徒使百官之降物

乞避位待罪表

歐陽永叔

任非其人則官必曠職時多闕政則天為降災惟譴咎之有歸難僥倖於獨免

中謝

伏念臣本以庸妄遭逢盛

明擢貳宰司與聞國政不能叶宣上德輔導至和頻年以來害氣交作春饑已甚饉疫相望秋潦暴興覆溺無數下致生民之愁苦上貽聖主之焦勞臣獨何心安於厥位舉朝廷之典法便合黜幽賴覆幘之寬仁尚容自効伏望皇帝陛下特回天造俯察愚忠俾解政機推行

憲罰以塞上穹之降責以警庶位之鰥官然後別選英賢俾居叅輔益圖更化之術上副求治之心自然人神以和災眚咸弭不惟臣適其分亦俾國無屈刑

乞避位待罪表

上天告戒比屋罹災虔思銷異之方願避進賢之路特迂聖訓未諒愚誠退自省循豈遑安處中謝伏以天人

之相去不遠見於事者若響之應聲賞罰之至要易知舉其大則以一而警百是以政有得而有失則災祥以

類而來官若成而若虧則黜陟以時而舉伏念臣猥由
愚陋進冒寵榮一秉政機五更歲律相府之事無不總
既皆得以與聞斯人之徒不聊生欲於何而歸咎辜朝
廷之委任貽君父之憂勞此而不誅何以勵衆伏望皇
帝陛下奮然睿斷赫以皇明理其曠敗之愆正厥經常
之法置之散地全以寬恩誓堅犬馬之心終効涓埃之
報

乞避位待罪表

陰沴干時聖心軫慮明詔一下羣臣震惶況居任責之

司敢為幸免之計

中謝

伏惟皇帝陛下自膺眷命光紹

丕圖總攬萬機之繁講求三代之治旰不遑食勵文王

之小心行之以勤躬伯禹之盛德固已生民受賜品彙

蒙休宜召至和以來嘉應而善氣未効時災沴臻惟天

聰明異不虛出示人警戒咎必有歸所以三事之臣連

章瀝懇況臣最為濫竊尤玷寵榮方平日以尸居不知

引分及敗官而宜罰其敢逃刑伏望陛下俯抑至慈深

思大謹退其不肖以為修政之先不以空文庶得應天之實

乞宮觀表

司馬溫公

竊以不能者止蓋量力以効忠有疾則辭豈愛身而避事輒殫悃悞上瀆高明

中謝

伏念臣學古迂踈受材淺

薄惟期不欺而行已豈謂有志於濟時徒以辱先朝過聽之知荷陛下非常之眷越從散地擢處近司雖智力之已窮諒毫分之無補屬嬰衰疾累涉旬時沉綿幾及於

膏肓羸瘦僅存於皮骨桑榆向暮藥物難瘳未知朝謁之
何期惟恐顛隳之無日千錢賦祿豈高卧而可當三事
列居非養痾之所處夙宵興念怵惕匪寧何待人言固
當自省伏望皇帝陛下仁深惻隱明燭幽微曲成萬物
之宜不奪一夫之守使其全進退之義察其無矯激之
心早賜允俞俾遂安養伏乞令臣宮觀差遣一任下情
上達必冀於感通人欲天從終期於得請

乞宮觀表

王介甫

疏榮特異敢忘圖報之忠陳力弗能當布可辭之義中
謝伏念臣晚陪興運久迂近司慙愚弗逮於清光衰疾
更成於瘵曠苟免大呵之責乃叨異數之加授以戎旃
班之宰席松楸舊國實使鎮臨蒲柳殘年見為榮耀顧
在宣化承流之地方當循名質實之時疲曳難支顛隤
可畏仰祈睿眷俯徇愚衷并解將相之官外除宮觀之
任託依田里瞻守丘墳尚憑伏養之私終獲夷瘳之福
敢忘策勵更復糜捐

乞宮觀表

輶傳俯臨璽書狎至仰荷眷存之厚第懷感悸之深力
有不勝勉非所及輒輸危懇再冒天威中謝伏念臣久
悞至恩力難圖報過尸榮祿易取災危力憊矣而弗支
氣喘焉而將蹶窮閭掃軌斯為待盡之時幕府建旄豈
自養痾之地所懼曠瘵之責敢辭逋慢之誅伏望皇帝
陛下照以末光遂其微志使壇陸之鳥無眩視之悲濠
梁之魚有從容之樂庶圖瘳復更誓糜捐

乞宮觀表

筋骸衰朽僅有餘生肝膈精微簡在聖德豈圖寵獎未
賜矜從輒冒威尊更輸情素

中謝

伏念臣久妨機要初

乏涓埃苟免庶尤實荷恩私之至敢緣多疾更尸名器
之崇比辱使輶係宣詔旨深惟策勵仰稱龍光而况病
瘵有加療治無損辭榮家食乃為理分之宜干澤自榮
尚恃眷憐之舊伏惟皇帝陛下衡聽萬事器使衆材念
其龜勉之終難假以便安而少愒庶希體力圖報毫分

五百家播芳大全文粹卷七
中

欽定四庫全書

五百家播芳大全文粹卷七下

宋 魏齊賢

葉 棻同輯

陳乞表

乞致仕表

蘇子瞻

七十致仕國有舊章再三上聞情非虛飾

中謝

伏念臣

早塵顯仕才本空疎晚依至道心存止足年方未及亟

問間官老即當休懇求謝事陛下矜憐耆舊特屈典常
許帶賜名坐臨仙館臣眷戀德澤難於固辭勉強衰遲
領此深眷空縻厚祿已復三年仰愧朝廷俯慙朋友敢
緣禮律之舊力丐筋骸之餘蓋陛下欲優容老臣而臣
之蒙賜已久臣將畏避滿溢而陛下之流澤愈深誠恐
一朝溝壑之虞遂有終身負乘之恥逮此未冒得以自
陳伏惟皇帝陛下成物自天愛人以德君臣之際非獨
以爵祿養養為恩進退之間固將以名節始終為意誠

使臣得退伏閭里歌詠聖時行葦無牛羊之憂蒲柳免風霜之患則私心自得國體兼存區區悃誠實冀得請

乞致仕表

老而求退豈以為名病而得閒本其至願飛章自乞誠意未孚特蒙賜書勉以就職

中謝

臣聞引年去位事君

之舊章懷祿忘歸人臣之深戒自昔不得謝者在禮雖或許之然皆廟堂注意之臣疆場折衝之任邦家倚以為重神人賴以為安留之者既自有詞居之者誠亦無

愧是以禮存權制人絕間言未聞退處間官坐縻厚祿
竊此異數晏然偷安伏念臣早事三朝晚遭興運首被
揀擇與聞幾微貪戀聖明豈有窮已徒以寵祿盈滿懼
速顛濟筋力衰疲理難勉強幸緣舊典敢固自陳伏惟
皇帝陛下量極乾坤德隆父母因至誠之勤請杜無名
之誤思念臣平生粗守廉隅恥於僥倖使臣今日得安
分限即是恩私區區寸誠得請乃已

乞致仕表

誠發於中一言可信恩加望外再請未從顧惟衰朽之
年久竊尊榮之寄雖蒙異眷敢以自安

中謝

臣聞事君

之禮少壯不敢不勉行已之義老病不可不歸壯而不
勉則失時老而不歸則忘恥今臣心力衰退手足支離
謝事之期已逾三歲訴天之請蓋又累年况復同列之
間比多得請而去臣言詞淺陋未足以回天勢力孤單
中無與為地苟遂盤桓顧寵俯仰懷慙志不克伸沒有
遺恨伏惟皇帝陛下至誠樂善多士克生元首股肱自

足名世奔走先後未嘗乏人豈臣去留足為輕重徒以遺簪可念遂忘朽敝之難堪老馬尚存不知馳驅之下逮致之顛覆之地恐非愛惜之宜故寵臣以尊名不若使臣得全廉恥之為貴畀臣以厚祿不若使臣得守分限之為安凡厥保全之餘斯皆聖明之賜力陳危懇尚冀必從

乞致仕表

歐陽永叔

再貢封章乞從致仕伏奉詔書宜不允者竊稽典禮退

止一辭上瀆睿慈臣今三請雖未忍捐棄之意曲煩再
諭以丁寧而不勝迫切之誠尚冀終蒙於開可

中謝伏

念臣稟生至陋力學不強徒以畧誦仁義之言粗知廉
恥之節早緣一藝擢自諸生智非先見之明材無適用
之敏但知報國不敢謀身惟枉尋直尺之不為故圓鑿
方枘而難合以致被侵陵於羣小遭詆毀之百端而臣
忍辱強顏踰時歷歲蓋思責任之方重顧於去就而難
輕今者幸蒙寬恩獲保孤拙脫於死地優以便藩既無

功於勤勞徒坐尸於寵祿加以艱危備歷憂患尤多老
將疾以偕來形與神而盡瘁昔而少健黔驢之技已殫
今也病衰駑馬之力難強始露肺腑肝之懇乞收骸骨而
歸迹臣前後之心可見遲回之久不敢同於妄舉蓋幸
冀於必從伏惟皇帝陛下推天地之仁垂日月之照察
臣既非狷憤以肆一朝之忿又非矯激而希高世之名
本由多難之餘誠以不能而止矜其朽憊賜以哀憐許
上印章退居田里使病樗臃腫盡爾天年斤鶚逍遙遂

其物性幸克成於素志惟仰賴於鴻私

乞致仕表

上恩曲諭已至矣而丁寧下愚弗移但頑然而迷復論
罪合當於誅戮原情尚冀於矜從

中謝

伏念臣以空言

少實之文字泥古不通之學遭逢亨會玷竊寵靈祿利
已豐乃辭陳力恩私未報輒欲便身推是以言固難逃
責若乃艱危險阻僅存將盡之餘齡沮辱摧傷無復平
生之壯氣加以形體衰頹疾病侵陵顧雖戀於軒裳遂

退甘於畎畝語其此志又若可哀自申五請之勤已涉
三時之頃天慈惻隱聖度優容為駑馬雖疲顧伏轅之
已久而遺簪至賤念舊物而不忘臣當上體至仁勉安
厥位而夏秋交際痾疹日沴弱脛零丁惟存骨立昏矇
眊瞽常若冥行未知痊損之期終當廢去而苟遂退休
之懇尚竊榮名是敢更彈悃悞之私冀動高明之聽伏
望皇帝陛下推乾坤覆載之私廣日月照臨之光少寬
屢瀆之刑俯徇至誠之德庶使戒滿盈而歸止免災疾

以全生老安治世之和永荷終身之賜

乞致仕表

恩深煦嫗感極涕洟雖情有迫於危心不知自止而辭
已窮於累牘幾至無言惟以至誠期於必達自乞憐於
君父不復謀於著龜

中謝

伏念臣家世單平性姿中下

少從官學本免饑寒不自意於遭逢遂進階於華顯然
而羣材方茂蒲柳未秋而早衰衆駭並馳駑駘中道而
先乏而向何難勝之任用竊踰分之寵榮風波憂畏而

卷之七
慮已深疾病侵陵而老亦至故自辭於機政即謝願於
軒裳蒙上聖之至仁念三朝之舊物每曲煩於訓諭久
未忍於棄捐竊惟臣之事君必本忠信言不顧行是為
罔欺而臣口日誦於田閭身坐貪於利祿可畏至公之
議何施有醜之顏每自省循莫遑啟處豈敢妄避再三
之煩瀆猶希萬一之矜從伏望皇帝陛下特軫天慈俯
回睿聽察前言之可復蓋屢請者有年哀下愚之不移
俾卒成於素志徇其素志乞以殘骸臣若得上還印綬

於有司自駕柴車而就路晚節知無于大過沒齒永荷
於鴻私

乞致仕表

晁之道

負罪竊食深慙大恩緣衰乞骸仰干洪造籲天瀝懇跼
地汗顏

中謝

伏念臣拙疎無他孤陋自守賴先臣之緒

業荷累聖之寵知誤國使令甘心殞越咎已深而猶貸
斥不遠而遽歸仍玷宮祠復還官秩省分悉踰於志願
殞身莫報於生成冀緣愛物之心遂露挂冠之請敢自

忘於罪戾實終恃於恩憐伏望皇帝陛下憫惻彫殘照
知悃悞及未填於溝壑俾獲返於丘園死節捐軀悵慙
素志酣歌擊壤欣餞華顛乞特許臣守本官致仕

乞致仕表

代

仕當知止賢哲之所共由恩有匪頒今古以為至寵敢
援禮典盡布懇誠

中謝

伏念臣遭世盛明置身通顯服

勞四紀受寵五朝任每過而食浮志雖勤而效寡久玷
遺老積慙誤恩故自累歲以來頻露引年之請至親灑

於宸翰示曲加於眷慈謂雖粉骨以莫酬夫豈乞骸之
可必仰貪聖世又閱期年愈羞克壯之猷空忝居留之
任矧已愆於膺力猶分秉於節旄揆非所宜去乃為稱
伏望皇帝陛下載矜遲暮俾遂退休既獲解組之私仍
免誇朝之恥生無後咎沒有餘榮終愧大恩不踐裏尸
之志勉尋舊學尚追擊壤之歌

乞致仕表

忱辭已竭淵德未回謂據經而可言敢呼天而力請自

忘進越蓋恃衰矜

中謝

伏念臣器淺才疎力衰齒豁階

嘗陞於一品報即乏於萬分載典鑰於北門就秉旌於
南土但經歲月終愧寵靈雖天地至恩未忍捐棄而桑
榆暮景止合退休老益慕君病難報國惟有以時乞身
而去庶幾不累知人之明矧疲薘之有加覺顛隳之必
至冀能遠恥非欲近名伏望皇帝陛下覆以慈仁愍其
衰謝未及填於溝壑俾獲返於田廬餘生幾何皆上所
賜固慙疏傅豈敢竊大夫之賢自比華封猶能祝聖人

之壽

乞致仕表

趙承之

事君以忠豈致身之足吝不能者止懼陳力以難勝矧
當覈實之朝敢廢省躬之義輒輸懇至仰控高明中謝
伏念臣起自諸生素無他技荷累朝之眷遇歷數紀以
馳驅先帝擢於稠人待以國士陛下收之末路寘彼從
官第勤夙夜之勞曾乏涓塵之補向分符於嶺嶠實寄
命於炎陬因冒瘴氛遂嬰首疾疹已深於歲序事嘗簡

於天聰自膺出戍之行屢屬沉痾之疾時中瞑眩詎保
顛危雖勉強朝昏僅未墮於職守而叨逾寵眷懼愈速
於災殃敢援戒得之規用布乞身之請伏望皇帝陛下
天慈博愛聖度曲全憐其命分之奇窮迫以年齡之晚
暮許上印紱聽歸里閭庶憑帷蓋之仁少惕桑榆之景
鳴鐘戒旦勉貽誚於冥行故里言歸尚叨榮於畫錦

乞致仕表

劉莘老

近上封章願還官政伏奉訓勅未賜允俞者忱辭冒貢

蓋揣分以宜休溫詔發中尚推仁於不忍荷眷私之特
厚嗟感涕以無從瀆罔避於再三情既殫於萬一中謝
伏念臣生惟孤介性實頗愚讀書妄意於功名委質幸
逢於際會誤被恩榮之若此所宜報稱以何如故奔走
於四方未嘗避事雖典司於內史不敢辭難明主既亮
其樸忠衆議頗知其強力況此邊隅之久晏偶當年穀
之屢豐在人情宜可偷安於官事粗能塞責徒以年既
老而將耄病得衰而更侵顧差劇以難常豈安全之可

恃與其誤驅勞於緩急無所辭誅曷若保進退於初終
自謀引去及未填溝壑之際願得骸骨而歸仰冀聖慈
俯從人欲伏望皇帝陛下曲矜舊物洞照丹誠憐其奉
事頗勤幸無罪戾憫其筋力難強非有覬覦俾獲謝於
盛時庶克全於晚節華山歸馬豈無戀於華軒靈沼游
魚尚永依於至德

乞恩澤表

宋子京

叨華禁從逢聖誕期輒丐餘榮更延賤息中謝伏念臣

有男試將作監主簿定國久踰冠齒粗習儒猷向因臣兄以猶子之親預叅士食逮臣蒙持橐之列已及蔭條顧緣試秩之初未齒為真之籍敢因盛節就冀成恩庶將稚蒙茲敦義教省身可勉收報為期

乞恩澤表

籍塵秘禁身託近藩大饗在辰職來預慶緣從官之舊比有任子之功條輒忍覲顏更申妄請竊以臣男彥國甫當蒙孺粗訓義方未專一業之勤遽覲千齡之盛不

能自達庸丐賞延幸當朝需之覃冀預士名之食倘榮
於嗣獲寵而家願交勵於樸忠得永酌於覆育丹愚所
願殞踣無忘

乞異姓恩澤表

幸班禁近獲造光華凡再侍於明裡得推恩於異姓敢
援新制以寵私閥伏念臣有舅進士朱某幼習藝文世
承紱冕未預鄉革之薦久懷家食之慙以臣永嘆渭陽
希榮母黨願筮仕途之籍以光孝治之辰誓罄涓埃共

期酬補

遺表

曾子固

犬馬之質難駐於顏齡日月之光尚攀於愛景

中謝伏

念臣出於悴族進於謏材文辭講說制策之科衆稱華
選儒館掖垣經帷之職世謂清塗獨徧竊於美名蓋親
逢於亨運至於總銓衡之要劇領京邑之浩煩蔑有勞
能可論報稱冒寵靈而過厚致災疚之交攻迫霜露之
所侵且將漸盡幸髮膚之無毀得以全歸方去闕庭長

投泉壤輒陳遺志猶及能言伏願皇帝陛下御六氣之
和慎調興止享萬年之祚永庇華夷再念臣偷殘息之
僅存覬餘恩之可丐敢祈仁眷終賜矜憐臣有男進士
嶧孫男某親堂弟茂共出寒鄉稍親薄技封菲不遺倘
微祿之獲霑魚菽可供庶遊魂之未餒伏望聖慈並於
文資內安排妄茲干澤愧在忘庶保存歿之孤蹤託始
終之大賜生而無益曾莫及於銜環死或有知猶庶幾
而結草

遺表

蘇子由

衰病既侵大期將至顧窮日景瞻戀聖時忍死一言瞑

目無恨

中謝

伏念臣少年感慨有志功名晚節遭逢屢

經驅策總戎西北方朝廷旰食之秋為國威懷正將帥
分憂之日誓將勉勵少答恩私而施設未遑罪戾隨至
荷聖神之普照曾竄逐之幾時安居里閭退迹漁釣誠
心自信冀天日之尚回歲月潛移謂俯伏之可待而命
之弗予冥不自知俯仰之間彌留已甚伏惟皇帝陛下

躬堯舜之明哲復漢唐之緒餘引領太平之功側身同
德之士臣雖竊見其始而莫究其終興言及茲銜痛沒
世然臣聞之惟至誠可以格物惟至仁可以安人刑非
為治之先兵實不祥之器此皆陛下聰明之自得老生
平昔之常談將死之言庶幾於善苟有取於萬一則雖
沒而猶生

遺表

代

黃魯直

依日月之末光未殫報國愴桑榆之晚景忽慟窮途輒

輸將死之言倘動蓋高之聽中謝伏念臣生長孤外遇

逢聖明學淺而志卑才拙而用小先皇帝擢收流落湔
被塵泥擢登清禁之班許以經遠之器二聖臨御四門
穆清無補涓埃薦蒙纒策長地官術不足以富國丞相
史志不足以回天少寬素食之憂得備維藩之寄重分
虎節出拊方州雖受命即行驅除夙駕而短生無祿隕
越路隅猶結戀於清時敢憲忠於未暝伏念皇帝陛下
尊事耆老延登俊良緝熙六藝之光明靈承七廟之謨

烈盡子道以法舜之孝師天常以體堯之文國家膺無疆之休微臣釋沒齒之憾

遺表

汪彥章

死生猶夜旦之常理之必至犬馬愛蓋帷之賜恩則長辭假續息之須臾貢芻言於咫尺

中謝

伏念臣起家一

介委質五朝道君擢貳機衡去國坐逾於一紀淵聖收還廊廟冒恩僅及於半年由經世之才疎故在廷之日鮮昨屬裔夷之謀夏適當公輔之無人誤辱延登俾圖

康濟運籌決勝安知先物之機覆餗興災果致妨賢之咎會真人之起鄣陪多士之興周纔望清光即膺煩使冀桑榆之晚景輸塵露之微勞而臣力與願違衰將疾至不圖交印之始已困負薪之憂今則脈遽瀉沉氣將漸盡莫扈征遼之後徒懷城郢之忠伏望皇帝陛下紹舊監新宅中圖大克勤克儉用祖宗可久之規作福作威合中外至公之論簡蒐卒乘褒禮忠良上以迎二聖之還下以正四夷之守臣報恩已矣戀闕潛然走仲

達於渭濱雖非所及亢杜回於輔氏猶或可為

遺表

晁之道

數必有盡又安足悲忠則無窮敢不自力暫駐已頽之

力勉陳將死之言

中謝

伏念臣奮起諸生遭遇熙朝備

陳委使進服清華迭分總於師干屢往陳於境土綿薄

雖慙於報効聖明獨亮其樸忠心隨力殫老將疾至冀

因間局漸息沉痾旋被眷私特加命召即欲扶持朽質

瞻望威顏而臣寵祿滿盈災疾崇降浸趨危殆已極膏

育存愧深恩沒懷餘恨猶貪戀於聖世願傾竭於愚誠
伏望皇帝陛下益廣舜聰祇循堯道日勤庶政以圖治
時忘萬事而嗇神永俾黎元均蒙福祉臣今指期待化
假息陳辭即萬鬼以為隣籲九天而永訣長負累尸之
志徒傾結草之心

遺表

死生大矣方乘化以長辭君親臨之尚呼天而永訣力
駐已頽之景勉陳將死之言中謝伏念臣學不通方才

非適用荷累聖之眷獎躡處高華迹一門之寵光最為
遭遇伏蒙皇帝陛下念神考誤知之遺意記先臣盡節
之往勤超先時髦陪預初政力雖殫於驚蹇愚自抵於
譴訶迄蒙貸物之慈獲遂首丘之志寵臨既溫災疾荐
臻顧未酬於丘山猶有冀於藥石而遊波不返知難戀
於明時餘息僅存願少輸於危悃伏望陛下益觀成憲
永御泰和畢來萬國之歡心並受三靈之繁祉每念功
於先世思加惠於曩愆臣負轡沒身感恩入地生固無

益志已愧於捐軀死如有知忠尚圖於結草

遺表

代劉寶學

胡明仲

臣某言生也有涯孰逃定數死而不朽難跂前修獨餘

垂盡之忠仰籲蓋高之聽

中謝

伏念臣蚤憑世貴浸歷

仕途昨屬外臺入丞卿寺偶鎮府上扞城之代於機司

叨中秘之嚴繼竊使華俄丁家難值神武中興於丕祚

而師干初試於邊庭世歷艱虞家傳忠義妄意功名之

際會不虞材畧之卑凡祇赴詔音亟聞除命坐談將幕

曾無虎豹之韜攝事帥藩寧有鸛鷖之陣盡瘁謬輸於
筋力論功蔑著於毫毛投竄是宜甄收未替出駕輅車
而撫士歸分符竹以臨民尋從祠館之便安擢付江甯
之要重疏榮渙汗還綴甘泉而臣識昧遠猷器慙大受
與時寡偶造事多窮推擠頻嘖於煩言保庇盡歸於王
度雖幸家庭之逸敢忘軒陛之思尚冀駑駘或堪策厲
詎知蒲柳頻迫風霜顧靈劑以何施悲逝川而莫返將
捐朽質勉貢善言伏望皇帝陛下並日照臨侔天覆幬

持守盈成之治柔能遠邇之情變太和於穆清措羣品
於熙晏大觀在上永隆不拔之基與物為春坐享無疆
之厯臣委身長夜絕望穹宸拖司寇之紳不能下拜寢
大夫之簪獲以正終

遺表

張安國

數莫逃於生死竟欲何言恩未報於君親沒有餘責忍
須臾之殘息聲激切之遺哀目斷而魂且將離泣盡而
血無以繼臣中謝伏念臣奮身孤外逢世休明早竊讀

於父書妄舉干於君祿命卿論秀不自意於先登射策
決科乃首蒙於親擢遭時宰之媚疾逮臣父以排擠保
全皆太上之恩簡拔出諸臣之右唯時英俊尚或沉於
下僚顧非賢能獨不待於次舉初典校於中秘俄寓直
於西清謂魯魚亥豕之未分何草創潤色之能稱在廷
之日雖鮮許國之心則堅多收箕斗之虛名寔誤冕旒
之虛眷一麾出守敢言宣力於藩條三折知醫因頗究
心於民瘼纔十更於歲律凡六易於守符近由江浙之

間遠若湖湘之外南薄桂海北臨荊州閩寄非輕轍環
幾徧雖無問馬及羊之智鉤致名聲而有帶牛佩犢之
風粗宣條教方當陛下大有為之日安有人臣不能成
之功實欲許以驅馳庶少裨於經理不能退安於田野
猶將終養於庭闈竟嗟忠孝之難全竊悼身名之俱殞
由才疎意廣福過災生未容解免於人非固已難逃於
鬼責視景曾桑榆之未遇望秋有蒲柳之先零僅諧嘏
菽之歡乃困負薪之疾既危懼之已甚猶洞屬以無時

氣屬續以少延手封章以冒貢伏望皇帝陛下祇循堯
道益廣舜聰務得賢以立太平之基因啟民而躋仁壽
之域更徐審於上策以無忘於中原思祖宗如在之靈
永社稷無疆之福臣今齋志以亡沒忍銜恨而不言更
餘結草之忠誓圖報効無復採蘭之緒養冀哀矜

遺表

張安國

大化不留已悟有生之幻鴻恩未報敢忘忍死之言輒
申犬馬之情仰瀆高明之聽伏念臣早從疎陋出際休

明被遇三朝服勞二紀但知守古人難行之學不能為
世俗適用之文才既乏於寸長道實恐於遠泥然叨塵
法從謬掌宸綸屢易郡符久閒祠籥顧便安而竊祿宜
盈滿於興災果膺疾於疹瘍莫遑安於藥石日暮途遠
難駐景於須臾事與願違冀陳忱於毫髮爰慕史魚之
諫仍希魏徵之忠隕淚無從籲天有請伏願皇帝陛下
聰聖勿蔽智勇必行進君子而退小人寬民力而勤庶
政紹復祖宗之法度整頓乾坤之綱紀故使海內傾心

上天悔禍叛臣假息行卷土以來歸勅敵憑陵即倒戈
而遠遁迺二聖重歡之日還九州共貫之風遂同光武
之中興不比晉元之南渡臣獲死牖下長謝人間舐犢
之悲惟忠孝必先於愛子結草之報雖泉壤不敢以忘
君臣無任

五百家播芳大全文粹卷七下